

CENTRALNA BANKA
BOSNE I HERCEGOVINE



ЦЕНТРАЛНА БАНКА
БОСНЕ И ХЕРЦЕГОВИНЕ

INFO CBBiH



U ovom broju:

PRIPREME ZA
OBILJEŽAVANJE 20.
GODIŠNJICE CBBiH



PODACI O
KRIVOTVORENOM NOVCU
U 2016. GODINI



DMS U POTPUNOSTI
OPERATIVAN



AKTIVNOSTI CBBiH
UKLJUČENE U
AKCIONI PLAN ZA
IMPLEMENTACIJU
KOMUNIKACIJSKE...



SUSRET GUVERNERA
CBBiH SA
PREDSJEDNIKOM
EVROPSKE CENTRALNE
BANKE



CBBiH NE BI SMJELA BITI
PREDMET JAVNE DEBATE



Izdavač: Centralna banka Bosne i Hercegovine;
Adresa: Maršala Tita 25, 71000 Sarajevo

Priprema: Služba za odnose sa javnošću

Prevod tekstova na engleski jezik: Služba za odnose sa javnošću

Lektura (jezici bh. naroda i engleski jezik): Služba za publikacije i biblioteku i
Služba za protokol i prevođenje

Web stranica: <http://www.cbbh.ba>
E-mail: pr@cbbh.ba
kontakt telefon: (033) 278 123

PRIPREME ZA OBILJEŽAVANJE 20. GODIŠNJICE CBBiH



U 2017. godini, Centralna banka Bosne i Hercegovine (CBBiH) obilježava 20 godina postojanja i rada, a u sklopu obilježavanja ovog jubileja, planiran je niz prigodnih aktivnosti.

Radi realizacije projekta obilježavanja godišnjice CBBiH, donesena je odluka o imenovanju odbora za organizaciju i provođenje aktivnosti. Organizacioni odbor, koji sačinjavaju guverner, članovi Upravnog vijeća CBBiH i viceguverneri, zadužen je za definisanje projektnog zadatka s okvirnim planom

aktivnosti koje će biti održane tokom obilježavanja 20 godina postojanja CBBiH, a kojim će se odobriti: datum održavanja planiranih aktivnosti; program konferencije i drugih događaja; koncept prigodne monografije i dizajn jubilarnih kovanica; odobravanje finansijskih sredstava predviđenih za planirane aktivnosti; praćenje toka pripreme i provođenja definisanih aktivnosti, razmatranje izvještaja o realizaciji projektnog zadatka. Okvirni plan aktivnosti obuhvata, između ostalog, organizovanje međunarodne konferencije, obilježavanje Svjetskog dana štednje, izložbu novca, aktivnosti u vezi s izradom jubilarne kovanice, pripremu publikacija, časopisa i izdanja, druge aktivnosti i manifestacije.

Izvršni odbor s pododborima se zadužuje da provede sve aktivnosti koje je definisao Organizacioni odbor i direktno je odgovoran guverneru CBBiH, uz obavezu redovnog informisanja Upravnog vijeća CBBiH o toku aktivnosti na pripremi obilježavanja 20 godina postojanja CBBiH.

PODACI O KRIVOTVORENOM NOVCU U 2016. GODINI



U periodu od 1. januara do 31. decembra 2016. godine, u Centralnoj banci Bosne i Hercegovine (CBBiH) vještačeno je ukupno 1.036 komada krivotvorenih novčanica, od čega 821 komad krivotvorenih novčanica KM, 162 komada EUR i 53 komada USD. Kada je riječ o kovanom novcu, u 2016. godini u CBBiH je registrovano ukupno 2.676 komada krivotvorenog kovanog novca KM. Od ukupnog broja vještačenih krivotvorenih novčanica KM, u prošloj godini najviše je bilo krivotvorina u apoenu od 100 KM (286 komada), a potom u apoenu od 20 KM (275 komada), dok je kod vještačenog krivotvorenog kovanog novca najviše bilo u apoenu od 1 KM (2.469 komada). Od ostalih valuta, u 2016. godini najviše je bilo krivotvorenih novčanica

od 50 EUR (66 komada) i od 100 USD (53 komada). Krivotvorine domaće valute su u najvećem broju slučajeva ocijenjene kao loše, dok je većina krivotvorina EUR i USD osrednjeg kvaliteta.

Kod prepoznavanja krivotvorine u odnosu na originalnu novčanicu treba imati u vidu činjenicu da osim papira, koji je specifičan i može se na dodir razlikovati od običnog papira, novčanice sadrže zaštitne elemente koji se mogu provjeriti bez upotrebe bilo kakve dodatne opreme. Tako npr. kada se novčanica okrene prema svjetlu, u papiru se mogu vidjeti vođeni znak i zaštitna nit. Novčanice imaju i reljefnu štampu koja se može osjetiti pod prstima (portret i tekstovi na licu kod KM novčanica). Postoje i optički promjenljivi elementi koji mijenjaju izgled ili boju pri promjeni ugla pod kojim se novčanica posmatra. O svim ovim elementima CBBiH obavještava javnost prilikom puštanja u opticaj novih serija novčanica, a informacije su dostupne i na web stranici Banke. Preporučljivo je provjeriti što više ovih elemenata na sumnjivoj novčanici, pa i uporediti ih s elementima na drugoj novčanici koja nije sporna. Osim ovih zaštitnih elemenata, postoje i elementi koji se provjeravaju upotrebom odgovarajuće opreme, a koju koriste banke i druge institucije.

Krivotvorene kovanice se od autentičnih mogu razlikovati vizuelno, te po dimenzijama, težini, materijalu, magnetnim svojstvima, detaljima u kovanju i sl.

DMS U POTPUNOSTI OPERATIVAN



Od januara 2017. godine, Sistem za elektronsko upravljanje dokumentima (Document Management System – DMS) u potpunosti je operativan i dostupan svim korisnicima koji imaju privilegije za DMS. Tokom 2016. godine obavljena je instalacija sistema, njegovo podešavanje, te je svima koji imaju pravo pristupa omogućeno da se upoznaju o radu sistema. Također, objavljena su korisnička uputstva i instrukcije u skladu s odgovarajućim uputstvom vezanim za radno mjesto.

Tokom 2017. godine, osim obaveznog korištenja DMS-a, kolanje dokumenata će se odvijati i putem klasične pisarne, odnosno dva sistema će raditi paralelno, a od početka 2018. godine, biće korišteno isključivo kolanje putem elektronske pisarnice.

Prednosti uvođenja ovakvog sistema su višestruke – prestaje potreba za manuelnom distribucijom predmeta, proizvodnjom velikog broja kopija u slučaju da se isti treba slati na više korisnika, čime se ostvaruju značajne uštede. Ovaj sistem također omogućava lakše praćenje statusa predmeta, zadavanje rokova po predmetu i lakše pretraživanje starih predmeta. Kada bude u potpunosti operativan, ovaj sistem bi trebao predstavljati veliku podršku efikasnijem i bržem obavljanju svakodnevnih poslova u CBBiH.

AKTIVNOSTI CBBiH UKLJUČENE U AKCIONI PLAN ZA IMPLEMENTACIJU KOMUNIKACIJSKE STRATEGIJE ZA INFORMISANJE JAVNOSTI O PROCESU PRISTUPANJA BiH EVROPSKOJ UNIJI



Centralna banka Bosne i Hercegovine (CBBiH) je predlaganjem aktivnosti koje će realizovati u 2017. godini, doprinijela izradi Akcionog plana Vijeća ministara Bosne i Hercegovine za implementaciju Komunikacijske strategije za informiranje javnosti o procesu pristupanja Bosne i Hercegovine Evropskoj uniji za 2017. godinu.

CBBiH je među 45 institucija koje su dobile dopis od Direkcije za evropske integracije da svojim aktivnostima, planiranim

za 2017. godinu, doprinesu izradi Akcionog plana za 2017. godinu. Akcioni plan je instrument za planiranje, praćenje i evaluaciju komunikacijskih aktivnosti, u ovom slučaju o procesu evropskih integracija BiH. Provođenjem Akcionog plana osigurava se strateško komuniciranje s ciljnim javnostima o procesima, izazovima i promjenama koje evropske integracije donose BiH i svim njenim građanima. Priprema ga Direkcija za evropske integracije u saradnji s nadležnim institucijama, a usvaja Vijeće ministara BiH.

Na sjednici održanoj 25. 1. 2017. Vijeće ministara BiH usvojilo je Informaciju o pripremi prijedloga Akcionog plana Vijeća ministara Bosne i Hercegovine za implementaciju Komunikacijske strategije za informiranje javnosti o procesu pristupanja Bosne i Hercegovine Evropskoj uniji za 2017. godinu, te prijedlog Akcionog plana, s određenim zaključcima.

CBBiH je za Akcioni plan delegirala aktivnosti koje će u kontekstu evropskih integracija, realizovati tokom 2017. godine, a to su organizovanje konferencije, izdavanje publikacije i edukacija učenika i studenata o aktivnostima CBBiH u procesu pristupanja EU.

SUSRET GUVERNERA CBBiH SA PREDSJEDNIKOM EVROPSKE CENTRALNE BANKE



Guverner Centralne banke Bosne i Hercegovine dr. Senad Softić je, na poziv guvernera Banke Slovenije dr. Boštjana Jazbeca, prisustvovao svečanoj konferenciji u povodu obilježavanja deset godina od uvođenja eura u Republici Sloveniji.

Tom prilikom guverner Softić se susreo s predsjednikom Evropske centralne banke gospodinom Mariom Draghijem. Cijeneći značaj podrške Evropske centralne banke Centralnoj banci Bosne i Hercegovine u procesu evropskih integracija, guverner Softić je pozvao predsjednika Evropske centralne banke da posjeti Bosnu i Hercegovinu i svojim prisustvom uveća konferenciju povodom obilježavanja dvadeset godina od osnivanja Centralne banke Bosne i Hercegovine, koja će biti održana u Sarajevu, u septembru 2017. godine.

CBBiH NE BI SMJELA BITI PREDMET JAVNE DEBATE

Visoki predstavnik Valentin Inzko i prvi zamjenik visokog predstavnika i supervizor za Brčko Bruce G. Berton posjetili su 13. 2. 2017. godine Centralnu banku Bosne i Hercegovine (CBBiH) i sastali se s guvernerom CBBiH dr. Senadom Softićem. Teme razgovora bile su monetarna politika, monetarna i finansijska stabilnost, te makroekonomski pokazatelji za Bosnu i Hercegovinu.

Visoki predstavnik Inzko i prvi zamjenik Berton izrazili su stalnu i neupitnu podršku Ureda visokog predstavnika (OHR) Centralnoj banci Bosne i Hercegovine i njenoj političkoj nezavisnosti i autonomiji, istakavši koliko cijene profesionalnost ove institucije i rad koji obavlja u interesu BiH i njenih građana.

Guverner Softić je iskoristio priliku da sagovornike upozna o aktuelnim aktivnostima CBBiH, uključujući upravljanje deviznim rezervama, aktivnosti na unapređenju registara i upravljanje gotovim novcem. Sagovornici su se također dotakli i teme evropskih integracija, budući da CBBiH ima značajnu ulogu u tom procesu.

„Centralna banka Bosne i Hercegovine nije samo daytonska institucija, ona je jedina institucija zadužena za monetarnu politiku u BiH. To je primjer uspjeha u BiH i od ključne je važnosti za stabilnost zemlje. Upravo zato je neprihvatljivo svako osporavanje Centralne banke i uspostavljenih i funkcionalnih aranžmana koji garantiraju monetarnu i finansijsku stabilnost“, rekao je visoki predstavnik Inzko.



Također je podsjetio da je „Centralna banka izgradila odličan ugled, a glavni elementi njenog uspjeha su njena profesionalnost i nezavisnost od politike. Zato je imperativ da ta institucija ne postane predmet javne debate, te da nastavi svoj uspješan rad“.

